

Thabiti katika Nguvu ya Mungu

Na uzima wa milele ndio huu, Wakujue wewe, Mungu wa pekee wa kweli, na Yesu Kristo uliyemtuma—Yohana 17:3.

Kuna faida ndogo mno inayopatikana katika usomaji wa haraka wa Maandiko. Mtu anaweza kusoma Biblia yote na kushindwa kuona uzuri wake au kuelewa maana yake ya kina na iliyofichika. Kifungu kimoja kinaposomwa mpaka maana yake inaeleweka akilini na uhusiano wake na mpango wa wokovu unapokuwa dhahiri, kinakuwa na thamani zaidi kuliko usomaji wa juu juu wa sura nyingi bila kuwa na kusudi mahususi akilini na hakuna fundisho zuri lililopatikana. Tembea na Biblia yako. Unapopata muda isome; kariri mafungu. Hata unapotembea mtaani, unaweza kusoma fungu na kulitafakari, ndivyo unavyoweza kulihifadhi akilini.

Uzima wa Kristo, ambao unatoa uzima kwa ulimwengu, uko katika Neno Lake. Ilikuwa ni kwa neno Lake kwamba Yesu aliponya magonjwa na kutoa mapepo; kwa neno Lake aliituliza bahari na kufufua wafu; na watu walishuhudia kwamba neno Lake lilijawa na uweza. Alilihubiri Neno la Mungu, kama alivyolisema kwa manabii na walimu wa Agano la Kale. Biblia yote ni udhihirisho wa Yesu Kristo. Ni chanzo chetu cha nguvu.

Kama ambavyo maisha yetu ya kimwili yanadumishwa na chakula, kadhalika na maisha yetu ya kiroho yanahuishwa na Neno la Mungu. Na kila roho inapaswa kupokea uzima kutoka kwenye Neno la Mungu kwa ajili yake. Kama ambavyo tunalazimika kula ili kupata lishe, ndivyo ambavyo ni lazima tulipokee Neno kwa ajili yetu. Hatupaswi kulipata kupitia kwa mtu mwingine.

Naam, Neno la Mungu ni mkate wa uzima. Wale ambao wanakula na kulimeng'anya Neno hili, wakilifanya kuwa sehemu ya kila tendo na kila sifa ya tabia, wanakuwa imara katika nguvu ya Mungu. Linaipatia roho nguvu isiyo kikomo, likikamilisha uzoefu na kuleta furaha ambayo itadumu milele (*The Signs of the Times*, Juni 25, 1902).

“Ndani yake ndimo ulimokuwa uzima, nao ule uzima ulikuwa nuru ya watu.” Si uzima wa kimwili unaoelezewa hapa, bali ni wa milele, uzima ambao ni mali ya Mungu tu. Neno, ambaye alikuwa pamoja na Mungu na ambaye alikuwa Mungu, alikuwa na uzima huu. Uzima wa kimwili ni kitu ambacho kila mtu anapokea. Si uzima wa milele au usiofikwa na mauti; kwa maana Mungu, Mpaji wa uzima, huutwaa tena.... Lakini uzima wa Kristo haukuwa wa kuazima. Hakuna mtu awezaye kuutoa uzima huu Kwake. “Mimi nautoa mwenyewe” alisema Yesu.... Uzima huu si wa kurithi kwa mwanadamu. Anaweza kuwa nao tu kupitia kwa Yesu. Hakuna kitu awezacho kufanya ili kuupata; anapewa kama zawadi ya bure ikiwa atamwamini Yesu Kristo kuwa Mokozi wake binafsi. “Na uzima wa milele ndio huu, Wakujue wewe, Mungu wa pekee wa kweli, na Yesu Kristo uliyemtuma” (Yohana 17:3). Hii ndiyo chemchemi ya uzima iliyowekwa wazi kwa ulimwengu

(The S.D.A. Bible Commentary, Ellen G. White Comments, vol. 5, 1130).